

XIV

Lai cîntçhieme piaînnatte était courieûje. C' était lai pus ptète de totes. È y' aivait li djeûte prou de piaice po leudgie in raimboiyou (*réverbère*) èt in aillumou de raimboiyous. Lo ptèt prînce ne pairveniait p' è s' échpyiquaie en quoi poéyînt sèrvi, quéque paît dains l' cie, tchu ènne piaînnatte sains mâjon, ne dgens, in raimboiyou èt in aillumou de reimboiyous. Poétchaint è s' dié en lu-meinme :

- Craibîn bîn que çt' hanne ât bête. Poétchaint èl ât moins bête qu' lo roi, qu' lo braigou, qu' l' hanne d' aiffâires èt qu' lo boiyou. Â moins son traivaiye é in senche. Tiaind qu' èl enfûe son raimboiyou, ç' ât cment ch' è fsaît vni â monde (*naître*) in yeûtchîn d' pus, ou bîn ènne çhoué. Tiaind qu' è çhiouçhe son raimboiyou çoli endouê lai çhoué ou bîn l' yeûtchîn. Ç'ât ènne otiupâchion brâment djôlie. Ç' ât voirtâbyement utiye poéchque ç' ât djôli.

Tiaind qu' èl aibordé lai piaînnatte è bèyè l' bondjoué réchpèctuouj' ment en l' aillumou :

- Bondjoué. Poquoi ât-ce que te vîns de çhiouçhaie ton raimboiyou ?
- Ç' ât lai couchigne, réponjé l' aillumou. Bondjoué.
- Qu' ât-ce que ç' ât lai couchigne ?
- Ç' ât de çhiouçhaie mon raimboiyou. Bonsoi.

Èt è l' é renfû.

- Mains poquoi qu' te vîns d' lo renfûre ?
- Ç' ât lai couchigne, réponjé l' aillumou.
- Î n' comprends p', réponjé lo ptèt prînce.
- È n' yi é ran è compâre, dié l' aillumou. Lai couchigne ç' ât lai couchigne. Bondjoué.

Èt è çhiouçhé son raimboiyou.

Èt peus è s' épondgé l' cèvré (*front*) aivô in moétchou è roudges cârreaux.

- Î faîs li in métie tèrribye. C' était réjnâle dains l' temps. Î çhiouçhôs l' maitîn èt i enfûyôs (*allumais*) l' soi. Î aivôs l' réchte di djoué po réchoûçhaie, èt lo réchte d' lai neût po dreumi...

- Èt, dâs çt' épotçhe, lai couchigne é tchaindgie ?

- Lai couchigne n' é pe tchaindgie, dié l' aillumou. Ç' ât bîn li l' déjeûdge (*drame*) ! Lai piaînnatte d' année en année é virie de pus en pus vite, èt lai couchigne n' é pe tchaindgie.

- Aidonc ? dié lo ptèt prînce.

- Aidonc mintnaint qu' èlle faît in toué poi mnute, i n' aî pus ènne sgonde de réépét. Î enfûe èt i çhiouçhe in cô poi mnute.

- Çoli ç' ât soûtche ! Les djoués tchéz toi durant ènne menute !
- Ç' n' ât pe di tot soûtche, dié l' aillumou. Çoli faît dje in mois qu' nos djâsans ensoinne.
- În mois ?
- Âye. Trente minutes. Trente djoués ! Bonsoi.
- Èt èl é renfû son raimboiyou.
- Lo ptèt prînce lo raivoété èt èl ainmé çt' aillumou qu' était taint fidèye en lai couchigne. È se seuvnié des meûcies di sraye que lu-meinme allait tieuri dains l' temps, en tiraint sai sèlle. È vlé édie son aîmi :

- Te sais... i coégnâs in moiyn de te rpôjaie tiaind qu' te voérés...
- Î veus aidé, dié l' aillumou.

Poéchqu' an peut être di meinme cô, fidèye èt féniant.

Lo ptèt prînce porcheûyé :

- Tai piaînnatte ât chi ptète que t' en faîs l' toué en trâs endjaimbées. Te n' és qu' è mairtchi prou

bâlement po dmoéraie aidé â sraye. Tiaind qu' te voérés te rpôjaie te mairtcherés... èt l' djoué dur'ré âchi grant que t' voérés.

- Çoli n' m' aivaince pe è graint-tchôje, dié l' aillumou. Ço qu' i ainme dains lai vie, ç' ât dreumi.
- C' n' ât p' de tchaince, dié lo ptét prînce.
- Ç' n' ât p' de tchaince, dié l' aillumou. Bondjoué.

Èt è çhioûché son raimboiyou.

Çtu-li, s' dié lo ptét prînce, di temps qu' è porcheûyait pus laivi son voiyaidge, çtu-li srait méprijie poi tos les âtres, poi l' roi, poi l' ordiou, poi l' boiyou, poi l' hanne d' aiffaires. Poétchaint ç' ât l' seingne que n' pairât p' aibchurde. Ç' ât, craibîn, poéchqu' è s' otiupe d' âtre tchôje que de lu-meinme.

Èl eut în sôpi d' eurpentue (*regret*) èt s' dié encoé :

- Çtu-li ât l' seingne aivô loqué i airôs poéyu faire mon aimi. Mains sai piaînnatte ât vrâment trop ptéte. È n' y' é p' de piaîce po dous...

Ç' que lo ptét prînce n' oûjait pe rcoégnâtre, ç' ât qu' è s' eurpentait de çte piaînnatte bnâchue è câse, chutôt, des mille quaitre cent quairante couthies de sraye en vint-quaitre heures.